

Nadžiju sej znowa wotkryć

Zahajenje Swjateho lěta w Romje, Drježdžanach a Budyšinje – a tutu njedželu w Róžeńće

Jenož kóždy štwórc lětstotka wotewrja w Pětrowej cyrkwi we Vatikanje wosebite wrota. To započnje so zdobom najwjetši katolski putniski podawk: Swjate lěto. Patoržicu, 24. decembra, je bamž Franciskus je we Vatikanje Swjate lěto 2025 wotewrěł. K tomu jědžeše 88lětny w jězbnym stole přez Swjate wrota baziliki, kotrež su hewak zamurjowane. Zwony Pětroweje cyrkwe přewodžachu kročel „do časa miłosće a wodawanja“, kaž swjaty wótc cyrkwin-ske jubilejne lěto zahaji. Po bamžu zastupichu duchowni a katolikojo ze wšěch pjeć kontinentow přez Swjate wrota do Pětroweje cyrkwe.

Próstwa wo měr a příkladnu cyrkej

Do swjatočneho překročenja tři a poł metra wysokich wrotow běše so Franciskus wo měr modlił. W pačerju wón Boha mjez druhim prošeše: „Wotewr naše duše za skutkowanje Ducha Swjateho, zo by twjerde wutroby zmjechčiči, zo bychu njepřečeljo so dialogej wotewrěli, přečiwnicy sej ruce podawali a ludy so w přezjednosći zetkawali.“ Za swojsku instituciju bamž Franciskus prošeše: „Daj, zo by swěrnje wo twojej lubosći swědčiča, zo by jako znamjo žohnowaneje nadžije na Bože kralestwo wu-prudžeć móhła.“

Dalše Swjate wrota

Po wotewrjenju Swjatyh wrotow w Pětrowej cyrkwi wotewriču w naslědnych dnjach dalše tajke w měsće, a to w kóždej ze štyrjoch bamžowskich bazilikow. Mjeztym zo přewzachu tole w Lateranskej bazilice kaž tež cyrkwjomaj Santa Maria Maggiore a Swjateho Pawoła před murjemi wotpowědny archyměšnicy, je swjaty wótc druhi džeń hód, štwórtk, 26. decembra, dalše Swjate wrota w romskim jastwje Rebibbia wotewrěł. Symboliski akt ma znamjo nadžije za wšitkich jatych po wšem swěće być.



Přepřečejo próh Swjatyh wrotow bamž Franciskus Swjate lěto 2025 zahaji. Foto: kna

Mnohe zarjadowanja

Pod heslom „Putnicy nadžije“ změja we wěčnym měsće cyle lěto najwšelakoriše cyrkwin-ske, socialne a kulturne poskitki za rozdzělnje cilowe skupiny. Tež něšto kaž małe swětowe zetkanje młodžiny je w lěcu planowane, na čimž so tohorunja serbscy młodostni wobdžěla. Swjate lěto skónči so ze zarjenzom Swjatyh wrotow wutoru, 6. januara 2026.

Temu „Nadžija“ sej znowa wotkryć

Ze swjatočnym procesionom a Božej mšu je biskop Heinrich Timmerevers w Drježdžanach njedželu, 5. januara, Swjate lěto zahajił, nawjazujo wón na wote-

wrjenje Swjatyh wrotow w Romje. Biskop Heinrich přeprošuje wosady swojeho biskopstwa, wužiwać Swjate lěto jako składnosć, sej temu „Nadžija“ znowa wotkryć a do srjedžišća pastoralneho skutkowanja stajić: „Přez swoju wěru mamy wšu příčinu so nadžijeć. Bamž Franciskus přeprošuje nas, snano samo za čěmnosćemi našich dnjow hladać.“ Biskop skedźbni tež na to, zo bamž w buli k Swjatemu lětu k tomu namołwja, křesćansku nadžiju we wšelakich žiwjenskich situacijach wobswědčeć.

Wěriwi běchu so na nutřkownym dworje Domu katedrale zhromadźili a čehnjechu z biskopom Timmereversom a emeritowanymaj biskopomaj Joachimom Reineltom a Konra-



Stacija při Permoserowym křížu w Budyšinje Foto: rl

dom Zdarsu za kopiju ikony kříža z Assisiskeje cyrkwe San Damiano w swjatočnym procesionje do katedrale. Před tymle swjatym křížom běše so swjaty Franc Assisiski často modlił. Na młodžinskich zarjadowanjach kříž tohorunja wužiwa. Mnohim je wón žórlo nadžije.

Chór Drježdžanskeho Gymnazija swjateho Bena pod nawodom Marije Poyiadji-Fink je procesion zahajił. Božu mšu wuhotowachu Drježdžanscy kapalnicy pod nawodom ta-chantskeho kapalnego mištra Christiana Bonatha.

Ze swojej wěru bóle so zaběrać

W Budyskej konkatedrali swjateho Pětra staj tachant Andreas Kutschke a kanonik Wito Scapan njedželu, 5. januara, Swjate lěto zahajiłoj. Spočatnje stejstaj z dalšej kopiju swjateho kříža ze San Damiano při zwjazowacym ploče simultaneje cyrkwe, hdžež so procesion wołtarneje služby po modlitwach a próstwach zahaji. Dalša stacija běše při Permoserowym křížu. Kanonik Scapan staji skónčnje kříž derje widžomnje do wołtarnišća.

Swjate lěto měli wěriwi za to wužić so znowa bóle na Chrystusa wusměrić, tachant Kutschke pozbudži dodawajo. „Wone přeprošuje k tomu, ze swojej wěru bóle so zaběrać, Bože služby sobu swječić a bibliju čitać.“ Zdobom wón namołwi, zo měli křesćenjo wo swojej nadžiji swědčić, přizna pak zdobom, zo njeje to lochko, haj, zo so samo pozdatne alternatiwy zabywaja. „Naše žiwjenje njenachila so ke kóncej, ale k dopjelnjenju. Jako putnicy nadžije chcemy jako wěriwi dale kročić.“ Božu mšu wuhotowachu nimo organista Kamila Maksymiliana Kulawika šola a dujerjo.

Wěriwi ze serbskich wosadow su tutu njedželu, 12. januara, w 14.00 hodź. do Róžanta prošeni. Ze swjatočnym nyšporom so w putniskej cyrkwi Swjate lěto zahaji. KP/kna